

Prix Benevol 2019 va a «Tür auf – mo vinavon»

Benevol Grischun renconuscha ed undra prestaziuns spezialas da la lavur voluntara

■ (mc) La fundaziun ecumena «Tür auf – mo vinavon» ha survegni il Prix Benevol Grischun 2019. L'intenziun primara da l'organisaziun ecumena «Tür auf – mo vinavon» è da stgaffir pussaivladads da scuntrada en la Cadi. La fundaziun «Tür auf – mo vinavon» è vegnida fundada l'onn 1991 e vegn purtada da la baselgia refurmada e da la baselgia catolica sco er da las vischnancas politicas da la Cadi. Cun organisar occurrenzas e realisar projects en il sectur socio-cultural promova l'organisaziun scuntradadas per meglierar la communicaziun, la convivenza e la chapientscha vicendaivla tranter giuven e vegl, indigens ed esters, catolics e refurmads e persunas d'alturas confessiuns e religiuns. La fundaziun saja activa dapi 28 onns e sustegnia divers projects nua ch'i vegnia s'engaschè sin basa voluntara, uschia argumentescha la schuria la surdada dal Prix Benevol Grischun 2019 a «Tür auf – mo vinavon». Tranter auter èn la canorta d'uffants Lumpazi a Mustér, la lavur da Giuventetgna Cadi, ils champs d'uffants e giuvenils Cadi sco er il project Mbara Ozio ma a favur da projects da svilup en Nigeria projects che vegnan purtads da la fundaziun.

Cun il Prix Benevol vul il post spezialisà per lavur voluntara Benevol dal Grischun far attent e render pli enconuschents la lavur voluntara e projects d'uniuns e privats. Il Prix Benevol vegn surdà en divers chantuns. En il chantun Grischun è il premi vegnì surdà quest onn per la 5avla giada.

Premis da reconuschientscha

La Fundaziun Benevol Grischun ha plinavant era surdà trais premis da reconuschientscha en las spartas sport, sanadad e bainstar social e cultura e furmazium dal temp liber.

En la sparta sport è vegnì undrà il Club da patins da Cuira. Quel è vegnì fundà l'onn 1921. El tgira passa 180 patinistas e patinists – da la principianta fin al sportist da prestaziun. L'october vegn mintgamai realisà il Cup Montalin che vala sco Cup svizzer. L'advent ha lieu il patinadi artistic da parada sin la Quaderwiese nua che tut las patinistas e tut ils patinists pon mussar lur abilitads ad in grond public.

Il Premi da reconuschientscha en il sectur sanadad e bainstar social è i a la VASK Grischun. Quai è l'Associaziun grischuna dals confamigliars da persunas cun schizofrenia e cun disturbis psichics

(VASK). Ella s'engascha per ils problems e per ils quitads dals confamigliars e da las persunas pertutgadas.

L'associaziun festivescha quest onn ses giubileum da 30 onns. L'atelier da scuntrada a la Sennhofstrasse 11 a Cuira sco lieu d'inscunter exista gia dapi 20 onns. Seminaris d'in di, il telefon da contact, purschidas creativas e bler auter pli vegnan mess a disposiziun da l'associaziun VASK che vegn purtada exclusivamain da persunas che lavuran sin basa voluntara e senza indemnizaziun.

En la categoria cultura, furmazium e temp liber va il premi a la Musica da giuvenils da Cuira. Quella exista dapi 75

onns. Ella promova l'emprender a sunar in instrument e pussibilitescha da far musica da cuminanza e sut cundiziuns favoravlas. L'accumpagnament musical dal didad ir ad acla da Cuira, il rimnar palpieri vegl sco er ulteriuras preschentažiuns ed activitads promovon la conscienza da l'atgna valur ed il sentiment da cuminanza tar ils uffants ed ils giuvenils.

Stans d'infurmaziun davart la lavur voluntara

Suenter la surdada dals premis èn las organisaziuns e las uniuns, che lavuran per part u dal tuttatag cun voluntarias e voluntaris, sa preschentadas cun stans d'in-

furmazium al public interessà. Quest'exposiziun ha mussà ina giada dapli quant varià che l'engaschament voluntar è en il Grischun. En tut ils secturs pussaivels da la vita è la lavur voluntara indispensabla. Ella tegna ensemen la societad e crescha ina plivalur nunpajabla per la convivenza da la populaziun.

Il cusseglier guvernativ *Peter Peyer* ha purtà il salid da la regenza dal chantun Grischun. Per il program accumpagnant han procurà gruppas da streetdance da roundabout Grischun. Las numerusas gruppas da saut ch'i dat en il Grischun stattan er sut direcziun da manadras voluntaras.



Surdada dal Premi Benevol Grischun 2019 e dals premis da reconuschientscha als victurs entras la schuria. Davos da san. Dominik Just, Hedi Wilhelm, Susanna Gadiant, Hedi Stutz, Erika Sprecher, Margrith Janggen, Nelly Meyer, Gabriela Cabalzar, Roland Just, Marlene Deflorin, Silva Semadeni, Günther Engler e Peter Peyer. Davon da san. Urs Marti, Andy Pinchera, Agnes Vasella, Michelle Lahl, Samuel Hächler e Raimund Hächler.